



► **M. Yves Cruchten** (LSAP), *rapporteur*. - Et geet hei och ëm d'Vertrauen, dat d'Bierger kënnen eisen Institutionen entgéintbréngen. Mir mussen als Gesellschaft eng Diskussioun driwwer féieren, wat fir eis d'Kärelementer vun enger gesonder, glécklecher Gesellschaft sinn, déi gutt funktionéiert an an där jiddweree seng Plaz huet.

Wa mir eng Äntwert op dës Fro hunn, wa mir also eis Prioritéite fir d'Gesellschaft definéiert hunn, da mussen mir eis och d'Méiglechkeet ginn, en Indicateur ze hunn, dee Joer fir Joer moosse kann, ob mir eis op déi Prioritéiten zoubeweegen oder eeben dovunner ewechkommen.

An der wëssenschaftlecher Literatur huet d'„welfare economics“ seng Plaz ageholl. Dem Adam Smith seng Theorie vun der „invisible hand“ huet méttlerweil 260 Joer um Bockel. Dass et der Gesellschaft automatesch besser geet doduerch, dass deen Eenzelne probéiert, säi Profitt ze maximéieren, dorunner géif den Adam Smith haut warscheinlech emol net méi selwer gleewen. D'Wëssenschaft huet evoluéiert, mee d'Politik ass do warscheinlech nach e bëssen hannendran.

D'Cour des comptes huet eis an hirem Avis un d'Häerz geluecht, d'Beispill vun Neuseeland méi genee ze analyséieren. An et war effektiv de Fall vun Neuseeland, dee mech derzou verleet huet, dëse Sujet erauszeseichen. Neuseeland huet den 30. Mee dëst Joer e Budget virgestallt, deen esou munches op d'Kopp gestallt huet. Dréi- an Aangelpunkt ass d'Wuelbefannen. E fousst op sechs politesche Prioritéiten, dorënner d'Lutte géint d'Kanneraarmut an d'Verbessere vun der mentaler Gesondheet vun de Leit an esou weider.

Am Virfeld sinn interministeriell Komiteeen zesummekomm, fir Mesuren auszeschaffen am Sënn vun deene sechs Prioritéiten, also eng transversal Approche. Et goufe chiffriert Objektiv festgeluecht, fir an deene sechs Prioritéite mëttelfristeg weiderzekommen. D'Budgetsartikele sinn net a Fonctioun vu Ministère ventiléiert, mee a Fonctioun vu Politikfelder opgestallt. Dat ass eng interessant Approche. Wat konkret dobäi erauskënnt, dat muss sech nach weisen.

A sengem Rapport fir de Budget 2006 ass de Roger Negri deemools agaangen op de Modell vun der Loi organique relative aux lois de finances a Frankräich, d'LOLF. D'LOLF huet probéiert, de Budget manner ze fragmentéieren. Si huet Nomenclature reforméiert, d'Architektur no „mission - programme - action“ deklinéiert. De Bilan ass awer mitigéiert. Sécher ass awer: Mir mussen et och zu Lëtzebuerg fäerdegbréngen, vun enger Logique des moyens op eng Logique des résultats ze kommen.

Bei der Lektür vum Roger sengem Rapport ass mer folgend Zitat opgefall, dat och schonn en anere Rapport benotzt huet an dat haut nach ëmmer seng Richtegkeet huet. An ech wëll lech dat och net virethalen: « Le Gouvernement fait le budget, la Chambre des Députés vote le budget, et la procédure budgétaire continue de s'apparenter à “une visite du château de Versailles : à pas accéléré et avec l'interdiction de toucher à quoi que ce soit”. »

Här President, am Laf vu menger Analys hunn ech festgestallt, dass bei ville gängegen Indicateure Lëtzebuerg net esou schlecht ofschneit, wann een un der Uewerfläch bleift. Wann een déi Indicateuren allerdéngs op vulnerabel En-

nerkategorien an eiser Gesellschaft, zum Beispill d'Familie monoparentale oder de Locataire um Privatmarché, uwennt, dann entsteet e ganz anert Bild vun eisem Land.

Als Konklusioun wëll ech Follgendes festhalen: Mir mussen net alles nei erfannen. Mir mussen eis net alles aus de Fangere suckelen. Bei mengen Entrevuen hunn ech festgestallt, dass mir zu Lëtzebuerg exzellent Instituter a Chercheuren am Land hunn, eng Matière grise, déi eis Opschloss ka ginn iwwert dat, wat an dësem Land viru sech geet. Mir hunn allerdéngs als Politik nach net de Reflex, fir déi Informatiounen méi a besser ze notzen. Dorunner kënnen mir alleguerter schaffen.

Ech denken, mir sollten dem Stateg d'Moyene ginn, fir a Kollaboratioun mam Conseil supérieur du développement durable an dem Conseil économique et social en neien Indicateur vum PIB du bien-être opzestellen, deen idealerweis kéint all Joers gemooss ginn, parallel zum klassesche PIB, fir dass mer iergendwann eng Kéier mat guddem Gewëssen an zu Recht kënnen behapten: „Well et eisem Land gutt geet, geet et och eise Bierger gutt.“

Ofschlësse wëll ech natierlech mat e puer Mercien. Ech fänken u mat engem Merci un de Finanzminister Pierre Gramegna a seng Mataarbechter. Am Ufank vu menger Ried hat ech schonn all deene Merci gesot, déi bereet waren, mech während menge Recherchen ze gesinn. Ech hätt der nach gäre vill méi gesinn, mee wéi esou dacks gétt um Enn d'Zäit awer knapps.

E grouse Merci natierlech un d'Chamberverwaltung an do virop un d'Madamm Guezennec, d'Sekretärin vun der Kommissioun. E Merci och un de President vun der Finanzkommissioun,

den André Bauler, fir seng Gentillesse a fir déi reegelméisseg gutt Rotschléi, déi e mer ëmmer mat op de Wee ginn huet. E ganz grouse Merci och un eis Mataarbechter an der Chamberfraktioun an do ganz besonnesch de Patrick Weymerskirch, dee mer vill gehollef huet, fir dëse Rapport op d'Been ze stellen.

A wann ech scho bei deem ganz Besonnesche sinn a well ech dozou vläicht net méi d'Geleeënheet kréien, dat ëffentlech hei ze soen: e grousen, jo, e ganz grouse Merci u mäi Fraktiounschef, den Alex Bodry, fir all seng Ennerstëtzung an de leschte Joren!

(Exclamations)

Alex, du bass fir vill Leit, net nëmme fir mech, e Virbild als Deputéierten. An dat Haus hei wäert dech staark vermessen, dovunner sinn ech ganz fest iwwerzeegt!

Zu gudder Lescht wëll ech lech allegueren heibannen nach Merci soen, dass Der mer d'Chance ginn hutt, dëse Rapport hei ze preparéieren. Dat war fir mech eng aussergewöhnlech Erfahrung an déi wëllt ech net mëssen. Ech soen lech Merci fir d'Gedold a fir d'Nolauschteren.


► **Plusieurs voix**. - Très bien !

► **M. Fernand Etgen**, *Président*. - Ech ginn Akt vun der Deklaratioun vum Budgetsrapporter, dem Här Yves Cruchten.

Muer um aacht Auer héiere mer den Exposé vum Finanzminister, dem Här Pierre Gramegna. Domat si mer um Enn vun der Sëtzung vun haut ukomm.

D'Sëtzung ass opgehewen.

(La séance publique est levée à 15.34 heures.)



SÉANCE 14

MERCREDI
18 DECEMBRE 2019

Présidence : M. Fernand Etgen, Président • M. Mars Di Bartolomeo, Vice-Président

Sommaire

- Ouverture de la séance publique
- M. Fernand Etgen, Président
- 7500 - Projet de loi concernant le budget des recettes et des dépenses de l'État pour l'exercice 2020 et modifiant :
 - 1° la loi générale des impôts modifiée du 22 mai 1931 (« Abgabenordnung ») ;
 - 2° la loi du 27 juillet 1938, portant création d'un fonds de réserve pour la crise ;
 - 3° la loi modifiée du 4 décembre 1967 concernant l'impôt sur le revenu ;
 - 4° la loi modifiée du 10 mars 1969 portant institution d'une inspection générale des finances ;
 - 5° la loi modifiée du 12 février 1979 concernant la taxe sur la valeur ajoutée ;
 - 6° la loi modifiée du 24 décembre 1996 portant introduction d'une bonification d'impôt sur le revenu en cas d'embauchage de chômeurs ;
 - 7° la loi modifiée du 28 avril 1998 portant
 - a) harmonisation de l'enseignement musical dans le secteur communal ;
 - b) modification de l'article 5 de la loi du 24 mai 1989 sur le contrat de travail ;
 - c) modification de la loi modifiée du 22 juin 1963 fixant le régime des traitements des fonctionnaires de l'État ;
 - 8° la loi électorale du 18 février 2003 telle que modifiée ;
 - 9° la loi modifiée du 17 décembre 2010 fixant les droits d'accise et les taxes assimilées sur les produits énergétiques, l'électricité, les produits de tabacs manufacturés, l'alcool et les boissons alcooliques ;

10° la loi modifiée du 29 avril 2014 concernant le budget des recettes et des dépenses de l'État pour l'exercice 2014 ;

11° la loi modifiée du 25 mars 2015 fixant le régime des traitements et les conditions et modalités d'avancement des fonctionnaires de l'État ;

12° la loi du 27 mars 2018 portant organisation de la sécurité civile ;

13° la loi du 10 août 2018 portant organisation de l'Administration de l'enregistrement, des domaines et de la TVA (suite)

et

7501 - Projet de loi relatif à la programmation financière pluriannuelle pour la période 2019-2023 (suite)

- Exposé : M. Pierre Gramegna, Ministre des Finances

- 7500 - Projet de loi concernant le budget des recettes et des dépenses de l'État pour l'exercice 2020 et modifiant [...] (suite)

et

7501 - Projet de loi relatif à la programmation financière pluriannuelle pour la période 2019-2023 (suite)

- Discussion générale : Mme Martine Hansen (dépôt des motions 1 et 2) (interruption par M. Mars Di Bartolomeo) - M. Eugène Berger (interventions de Mme Octavie Modert et M. Gast Gibéryen) - M. Alex Bodry (interventions de Mme Nancy Arendt épouse Kemp, M. Claude Wiseler et M. André Bauler) - Mme Josée Lorsché

Au banc du Gouvernement se trouvent : M. François Bausch, Vice-Premier Ministre ; M. Romain Schneider, M. Pierre Gramegna, M. Dan Kersch, Mme Corinne Cahen, M. Marc Hansen, Mme Sam Tanson, Mme Taina Bofferding et M. Lex Delles, Ministres.

(La séance publique est ouverte à 08.02 heures.)

1. Ouverture de la séance publique

► **M. Fernand Etgen**, *Président*. - Ech maa-chen d'Sëtzung op.

Huet d'Regierung eng Kommunikatioun ze maa-chen?

► **M. Romain Schneider**, *Ministre de l'Agriculture, de la Viticulture et du Développement rural, Ministre de la Sécurité sociale*. - Nee, Här President.

► **M. Fernand Etgen**, *Président*. - Mir héieren elo den Exposé vum Här Finanzminister Pierre Gramegna iwwert de Staatsbudget fir d'Joer 2020 an iwwert d'Programmation financière pluriannuelle. Här Finanzminister, Dir hutt d'Wuert.

2. 7500 Projet de loi concernant le budget des recettes et des dépenses de l'État pour l'exercice 2020 et modifiant :

1° la loi générale des impôts modifiée du 22 mai 1931 (« Abgabenordnung ») ;

2° la loi du 27 juillet 1938, portant création d'un fonds de réserve pour la crise ;

3° la loi modifiée du 4 décembre 1967 concernant l'impôt sur le revenu ;

4° la loi modifiée du 10 mars 1969 portant institution d'une inspection générale des finances ;

5° la loi modifiée du 12 février 1979 concernant la taxe sur la valeur ajoutée ;

6° la loi modifiée du 24 décembre 1996 portant introduction d'une bonification d'impôt sur le revenu en cas d'embauchage de chômeurs ;

7° la loi modifiée du 28 avril 1998 portant

a) harmonisation de l'enseignement musical dans le secteur communal ;

b) modification de l'article 5 de la loi du 24 mai 1989 sur le contrat de travail ;

c) modification de la loi modifiée du 22 juin 1963 fixant le régime des traitements des fonctionnaires de l'État ;

8° la loi électorale du 18 février 2003 telle que modifiée ;



9^e la loi modifiée du 17 décembre 2010 fixant les droits d'accise et les taxes assimilées sur les produits énergétiques, l'électricité, les produits de tabacs manufacturés, l'alcool et les boissons alcooliques ;

10^e la loi modifiée du 29 avril 2014 concernant le budget des recettes et des dépenses de l'État pour l'exercice 2014 ;

11^e la loi modifiée du 25 mars 2015 fixant le régime des traitements et les conditions et modalités d'avancement des fonctionnaires de l'État ;

12^e la loi du 27 mars 2018 portant organisation de la sécurité civile ;

13^e la loi du 10 août 2018 portant organisation de l'Administration de l'enregistrement, des domaines et de la TVA (suite)

7501 - Projet de loi relatif à la programmation financière pluriannuelle pour la période 2019-2023 (suite)

Exposé

► **M. Pierre Gramegna**, *Ministre des Finances*.- Här President, léif Kolleegeen aus der Regierung, Dir Dammen an Dir Hären Deputéiert, ech wëll dës Ried - déi zweet Ried zum Budget - ufänken, andeem ech dem Rapporteur Yves Cruchten felicitéiere fir eng exzellent an ausfierlech Presentatioun geschéier hei virun dëse Mikroen an och fir dee ganz gudde schréffleche Bericht. An ech soen dat wierklech aus ganzem Härzen, well ech hu fonnt, dass ganz vill gutt Iddien a ganz vill Proposen dra waren, op déi mer wäerten am Laf vun de Méint a Joren zrëckkommen.

Ech wëll haut och net eng Repetitioun maache vun där Ried, déi ech am Oktober hei gehalen hunn, wou ganz vill Zifferen dra waren. Ech wäert ganz e bësse mat Zifferen hantéieren, wann ech de sozialen Aspekt vum Budget wäert beschreiwen, mee soss meng Presentatioun a véier Deeler maachen:

- fir d'éischt wäert ech agoen op de Rapporteur a säi Bericht;

- zweetens, op d'Neieegkeeten, op d'Saachen, déi sech geännert hunn oder evoluéiert hunn an de leschten zwee Méint säit der Presentatioun vum Budget Métt Oktober;

- drëttens ginn ech dann op d'Avisen an, déi déi verschidden Instanze gemaach hunn,

- a véiertens, zum Schluss géif ech dann déi Haaptaggregater vum Budget nach eng kéier widerhuelen.

Den honorabelen Deputéierten Yves Cruchten huet a senge Remarken de Fanger op d'Aarmut an d'Inegalitéit geluecht fir ze soen, dass déi net akzeptabel sinn an der haiteger Gesellschaft. A wa Leit a prekäre Situatiounen liewen an engem räiche Land wéi Lëtzebuerg, da kann dat keen zefriddestellen.

De Rapporteur huet ënner anerem och iwwert d'Logementproblematik geschwat, déi en Aspekt dovunner ass an déi haaptsächlech Schwierigkeete stellt fir Leit mat engem klengen Akommes. Mir kréien am Laf vun den nächste Méint vill iwwert de Wunraum ze soen an ze maachen. De But wäert et natierlech sinn, d'Offer vu Logementer ze steigere an op där anerer Säit an der Steuerreform ze kucken, wéi mer kënnen déi continuel Spiral vu Präisser, déi an d'Luucht ginn, änneren. Dofir wäerte mer och eng Radiografie maache vun alleguerten de Steiermesuren, déi mer hunn, déi zur Präisspiral bäidroen.

Ech hunn och déi Remarque ganz interessant fonnt, déi Der gemaach hutt, Här Rapporteur, iwwer hybrid oder atypesch Formen vun Aarbechtszäiten. Och dat, mengen ech, misst an dësem Haus méi genau gekuckt ginn. An de manière générale géif ech soen, dass déi Recommandatiounen, déi Der gemaach hutt, alleguerte wäerten och vun der Regierung ënnert d'Lupp geholl ginn.

Eng vun deene wëll ech ervirsträichen, déi mer besonnesch wichteg schéngt. Dat ass Är Iddi, fir en Observatoire des inégalités ze maachen oder ze kucken, wat et do scho gëtt. Well ech sinn iwwerzeegt, dass mer all méi schlau géife ginn, wa mer géife besser verstoen, wéi den Écart de pauvreté wiisst. Dat ass och e Phänomeen, deen et net nëmmen zu Lëtzebuerg gëtt, dee gesäit een a ganz Europa. A wann et deen an Europa gëtt, wou et dat bescht sozial Netz gëtt op der ganzer Welt, da muss ee sech eng ganz Rëtsch Froe stellen.

Sozial Gerechtegkeet kann och nëmmen da garantéiert ginn, wann ee sech net op sengen Acquisen ausrount, wann een déi moderniséiert a

wann een déi natierlech un d'Gesellschaft an un d'Evolutiounen vun der Gesellschaft upasst.

De Budget vun 2020 wéi och déi viregt Budgete vun der Regierung Bettel 1 a Bettel 2 si keen Ensembl vun abstrakten Zuelen.

Mir sinn eis bewosst, dass dëse Budget, wou 47 %, also bal d'Hallschent vun den Depensen, sozial Depensé sinn, ganz wichteg ass fir d'Liewen an d'Schicksal vu ville Leit.

An hirem Avis huet d'Chambre des Salariés gesot, et misst een de Spillraum, dee mer am Budget hunn, méi ausnotzen, fir an d'Leit ze investéieren a fir sozial Gerechtegkeet ze fërderen. Mee ech géif soen, dat maache mer schonn. Et kann een natierlech ëmmer nach als Zil hunn, méi ze maachen, mee dat mécht dëse Budget, wou 47 % a Sozialleeschungen ginn, a Subsidien, an Transferten an a Subventionen. Dat ass e Bekenntnis zum Sozialstaat.

Ech sinn am Oktober schonn op déi verschidde Budgetskreditter agaangen, se alleguerten. Mee ech wëll dann hei fir ze beweisen, dass dat keng eidel Wieder sinn, nach eng kéier erënnere, wou mer dann alleguerten déi Sozialleeschungen hunn.

Fir d'éischt d'Zukunftskeess, dat sinn 1,2 Milliarden Euro, dovunner 910 Milliounen fir d'Alloctatiounen fir Familljen; d'Chèque-servicen, 426 Milliounen, eng Augmentatioun vun 8 % par rapport zum leschte Joer; d'Studentebourss, 126 Milliounen, eng Augmentatioun vun 10 %; konventionéiert Servicer fir den Handicapéiertesecteur, 79 Milliounen.

Mir hunn an dësem Gesetz d'Bonification d'im-pôt fir d'Betriber, déi Chômeuren astellen, renouveléiert. Dat ass vun der Chambre de Commerce extra begréisst ginn. Ech mengen, dass mer wierklech kee Grond hunn hei zu Lëtzebuerg, eis ze verstoppe weinst Saachen, déi mir iwwert de Budget am soziale Beräich maachen.

Loosst mer nach eng kéier zrëckkucken, wat mer an deene leschte sechs Joer gemaach hunn ënner Bettel 1: de REVIS geschaaft, Käschtepunkt 184 Milliounen; 20 Stonne gratis Kannebetreung mat Sproocheförderung, dat ass an deene Chèque-servicen dran; gratis Schoulbicher, 13,5 Milliounen; d'Reform vum Congé parental, 243 Milliounen; de Pappecongé - zéng Deeg sinn dat haut -, dat sinn och 7,5 Milliounen; an dann d'Subvention de loyer, déi weidergefuert gëtt.

An der Regierung Bettel 2, zweet Mandat, hu mer jo och scho ganz vill gemaach. Mir hunn de Mindestloun 100 Euro méi héich gemaach. An dat hu mer esou gemaach, dass dovunner zwee Drëttel vum Staat gedroe gëtt an een Drëttel duerch d'Augmentatioun vum Mindestloun. 100 Euro de Mount, dat sinn 1.200 Euro d'Joer. Dat ass ganz gutt fir d'Kafkraaft vun deenen, déi de Mindestloun kréien.

Mir hunn och op den 1. Januar vun dësem Joer Mini-Crèchen agesat, déi et virun net goufen. A mir hunn natierlech déi grouss an och wichteg Mesure vum gratis ëffentlechen Transport, déi den 1. Mäerz wäert a Kraaft treden. Dat ass och eng sozial Mesure, well do wäerten d'Leit Honnerten Euro pro Joer spueren, well se déi Abonnemeter jo net méi brauchen ze bezuelen. Mee et ass natierlech och a vläicht haaptsächlech eng Mesure, fir den ëffentlechen Transport ze fërderen, méi attraktiv ze maachen an domadder och eis Ziler vum Accord de Paris ze erreechen. De Käschtepunkt vum gratis ëffentlechen Transport, rappelléieren ech, ass 30 Milliounen d'nächst Joer a 40 Milliounen an de Joren duerno.

Munches gouf also vum Rapporteur Yves Cruchten hei gesot. Hien huet och vill vun deene Mesuren hei beschriwwen an ech freeë mech, dass mer säi Rapport wäerten an Zukunft no bei eis halen, fir an d'Zukunft ze kucken an déi virzebereeden.

Ech kommen dann elo zum zweeten Deel vu menger Presentatioun. Dat ass: Wat ass Neies geschitt oder Iwwerraschendes geschitt an de leschten zwee Méint? Dat ass guer net esou wäit zrëck, mee Dir wäert gesinn, dass, wann een dat elo vun e bësse méi Noem kuckt, an de leschten zwee Méint ganz vill geschitt ass.

Éischt Stéchwuert: Brexit. Jo, no laanger Incertitude ass den Horizont vum Brexit amgaangen, sech ze clarifiéieren. De Boris Johnson huet d'Wale kloer gewonnen an domat ...

► **M. Fernand Kartheiser** (ADR).- Très bien !

► **M. Pierre Gramegna**, *Ministre des Finances*.- ... ass et bal sécher - ech sinn awer nach virsichteg, ...

(Hilarité)

... well et waren esou vill Surprises an deem ganze Phänomeen, mee bal sécher -, dass den Austrëtt souguer nach vläicht viru Chrëschtadg

am brittesche Parlament wäert gestëmmt ginn. An ech géif gären eng Minutt oder zwou domat verbréngen, well wéi esou oft, wann eng Noriicht, déi mer eis net gewënscht hunn ... Well mir waren all der Meinung, et wär besser gewiescht, d'Vereenegt Kinnekräich wär an der EU bliwwen. Mee à partir du moment, wou ee jo muss de Referendum respektéieren, ass et den Interêt vun Europa a vu Lëtzebuerg gewiescht, dass mer e Brexit kréie mat engem Accord. An et ass jo dat, wat elo wäert geschéien. Dat ass eng gutt Noriicht.

Firwat ass dat eng gutt Noriicht? Jo, éischters emol, well dat elo séier geschitt. Wann also bis Chrëschtadg oder nach e puer Deeg duerno den Accord vum brittesche Parlament ugehall gëtt, dann trëtt d'Vereenegt Kinnekräich automatesch den 31. Januar aus. Dat ass automatesch, dat brauch keen anert Land ze ratifizéieren oder eppes ze maachen. Dat heescht, mir kréien do Sécherheet.

An dat heescht vill. Well an deem Accord ass eng Période de transition virgesinn, déi bis Enn 2020 geet. An dat gëtt de Betriber an de Persounen Zäit sech ze organiséieren. A wat nach méi wichteg ass: An där Période de transition gëlle gewësse Rechter. En fait gëtt all dat, wat de Moment Realitéit ass, nach ëmmer verlängert. Dat heescht, d'Leit kënnen sech ajustéieren, d'Betriber kënnen sech ajustéieren, de Marché unique bleift nach fir dat Joer bestoen tëschent Europa an dem Vereenegte Kinnekräich, wat an der Zollunioun bleift a wat och an dem Bannemaart bleift.

D'Vereenegt Kinnekräich huet och da finanziell Obligatiounen, déi do dran nach festgehalen ginn, déi dann och musse respektéiert ginn. Déi Transitionsperiod ass relativ kuerz, bis Enn des Joers. De brittesche Premier huet gesot, e géif déi net wëlle verlängere. An e wëllt an där Period mat Europa eng Fräihandelszon verhandelen. Dat ass eng gutt Saach. Do muss natierlech opgepasst ginn, dass d'Konditiounen vun deem Fräihandelsaccord esou ginn, dass mer e „level playing field“ behalen. Dat heescht, et muss een och derfir surgen, dass Groussbritannien net versicht, Standarden ze ënnerlafen, ob dat elo an der Ëmwelt ass, an de Sozialnormen, am Konsumenteschutz, an de Staatsbäihëllefen oder an der Fiskalitéit.

Mir sinn awer ganz zouversichtlech, dass d'Kommissioun wäert en ambitiësen a fairen Accord aushandele mat dem Vereenegte Kinnekräich. An dat ass zwar elo déi nei Kommissioun, wou och, mengen ech, den Här Barnier nach weider wäert eng Roll als Verhandler spille.

Dat war mäin éischte Punkt vun den Neieegkeeten: Brexit.

Den zweeten ass d'Handelssofkommes tëschent den USA a China. Och dat ass u sech eng gutt Noriicht fir déi zwee Länner, mee natierlech och indirekt eng gutt Noriicht fir Europa. Et ass en deels kommerziellen Accord, wou verschidden Tariffer, déi hätte sollen an d'Luucht goen, dann net an d'Luucht ginn a verschidden Tariffer och op där anerer Säit erofgesat ginn.

Dat wäert de Commerce international weider stärken. Dee war relativ schwach ginn duerch all déi kommerziell Tensiounen. An et wäert een also e positiven Effekt op den internationalen Handel gesinn. Et huet een e schonn op de Bourse gesinn. An alles dat wäert fir Lëtzebuerg och positiv Konsequenzen hunn.

Dës zwou däischter Wolleken, de Brexit an d'Tariffverhandlungen an dem steierleche Sträit iwwert de Commerce zwëschen China an den USA, hu sech also zum groussen Deel opgeléist. Dat ass dann och gutt fir eis Wirtschaft.

Ech kommen dann, an dat ass och nei säit de leschten zwee Méint, zu den neie Previsiounen vum Statec, wat d'Croissance zu Lëtzebuerg ubelaangt. Déi sinn am Dezember erauskomm. An ech muss soen, dëst Joer hate mir fir d'éischt, an ech hat dat a menger Budgetsried am Oktober gesot, déi Zifferen, déi de Statec amgaange war auszeschaffen, zur Verfügung gestallt kritt - déi waren nach provisoresch, hunn och nach liicht geännert an der Tëschenzäit -, soudass mer awer keng bëis Iwwerraschung do haten, dass déi Zifferen elo komplett anescht waren.

Warscheinlech well Brexit an Handelskrich zwëschen China an Amerika elo anescht gestallt sinn, warscheinlech och eng Rëtsch aner Elementer maachen, dass de Statec fir 2019, dëst Joer also, elo eng liicht besser Croissance virgesäit wéi nach virun zwee Méint, e Plus vun 0,4 %, dat heescht 2,8 % amplaz 2,4 %. Mir haten 2,4 % dran. Dat heescht, mir hunn do Sputt. An da fir d'nächst Joer ass d'Ziffer d'selwecht bliwwen, 2,4 % fir 2020.

All déi aner Indicateure bleiwen an de selwechte Parragé wéi do, wou mer waren, soudass mer kënnen soen, dass eise Budget op realistesch Previsiounen fousst, soudass ech och ka mat Zouversicht dovunner ausgoen, dass,

contrairement zu deem, wat d'Opposition reegelméisseg seet an och nach d'lescht Joer gesot huet, d'Previsioun vum Budget 2020 net ze vill optimistesches ugesat sinn, mee ganz einfach realistesch sinn.

D'Europäesch Kommissioun gesäit dat net anescht. A si seet an hirem Kommentar zu de Lëtzebuerger Zifferen: „Overall, the macroeconomic scenario underlying the Draft Budgetary Plan is plausible for 2019 and 2020.“

Eng drëtt Saach, déi nei ass säit Oktober, dat ass, dass mer en neien Emprunt opgehall hu fir Lëtzebuerg. Ech hat a menger Budgetsried am Oktober annoncéiert, dass mer dat géife maachen, well d'Konditiounen vum Marché ganz gënschteg waren. An dat huet sech och bewisen. Mir konnten 1,7 Milliarden Euro léine mat engem Negativzënssaz vun 0,25 %. Et ass fir d'éischt an eiser Geschicht, dass mer en negativen Taux d'intérêt kënnen kréien. An dozou wëll ech och nach soen, dass deen Emprunt véiermol iwwerschrifft war. Dat heescht, et hätt ee kënnen vill, vill méi léine goen. Dat ass natierlech, well Lëtzebuerg ganz attraktiv ass als ee vun den zéng Länner, déi en Triple-A hunn. Wann een elo e Wuertspill wëllt maachen, kéint ee soen: Den Triple-A mécht sech bezuelt.

Dës 1,7 Milliarden hu mer jo elo kritt am November. An déi 1,7 Milliarde sinn am Fong geholl net opgehall ginn, fir nei Schold ze maachen - dat ass also keng traditionell Schold, wann een esou wëllt -, well mir müssen am Mee 2 Milliarden zrëckbezuelen. Wann een dann nach ënnersträicht, dass mer am Oktober vun dësem Joer de Sukuk vun 200 Milliounen rembourséiert hunn, wann een dann déi dräi Operatiounen zesummenzielt, da mierkt een, dass vun November bis Mee 2020 d'Situatioun déi wäert sinn, dass mer och eis absolutt Schold ëm 500 Milliounen reduzéieren.

Véierte Punkt, e ganz wichtege: Wat ass geschitt an de leschten zwee Méint? Eh bien, mir hunn e Klimagesetz ugehall an e Klimaplang. Mam Klimagesetz hu mer eis e Kader gi fir eis Klimapolitik, déi ganz ambitiëss ass. Mir hunn eis als Zil geholl, fir bis 2030 d'Emissiounen ëm 55 % ze reduzéieren. An der Tëschenzäit huet d'Kommissioun och de Green Deal annoncéiert, wou d'Kommissioun sech fir d'ganz EU als Zil setzt, dass mer op d'mannst bis 2030 eng Reduktioun vu 50 % hunn. Lëtzebuerg huet sech also verflücht, fir 55 % ze maachen. Mir sinn also e bësse méi wäit gaange wéi dat, wat d'Kommissioun virgesinn huet. Bon, 2030 ass nach e bësse wäit. Mee dat Wichtigst ass, déi Ambitiounen, déi ee sech do gesat huet, déi muss een dann natierlech och erfëllen.

Mir hunn och aus Previsibilitätsgrënn am Budgetgesetz geschriwwen, dass mer d'maximal Seule vun den Akzisen kënnen eropsetzen. Dat steet am Gesetz dran, soudass mer déi néideg Flexibilitéit hunn, fir d'nächst Joer Ajustementer kënnen bei den Akzisen ze maachen, esou wéi ech dat virun zwee Deeg zesumme mat de Ministere Claude Turmes an Dan Kersch an enger Pressekonferenz annoncéiert hunn.

D'Chambre de Commerce an d'Chambre des Salariés bedauern dës Moosnam fir d'nächst Joer, dass d'Akzise sollen eropgoen. Ech muss soen, ech verstinn net, dass een net agesäit, dass Lëtzebuerg alles muss maachen, fir seng Klimaziler ze erreechen. An dat ass nëmme méiglech, wa mer op där Achs agéieren, wou mer déi meeschten Emissiounen hunn. An dat ass den Transport. Zwee Drëttel vun eisen Ausstéiss sinn am Transport.

Wann een also wëllt d'Emissiounen reduzéieren, muss een d'Saach do upaken. An dat hu mer och elo do annoncéiert. An ech warnen déi, déi eis roden, mir sollen eis iwwert déi Obligatiounen, déi mer am Accord de Paris hunn, ewechsetzen. Deene soen ech: Mir als klengt Land hunn all Interêt, eis Traitéen anzehalen, well dat ass déi eenzeg Aart a Weis, wéi mer kënnen gréisser Länner iwwerzeegen, Traitéen anzehalen.

► **Plusieurs voix**.- Très bien !

(Interruptions et hilarité)

► **M. Pierre Gramegna**, *Ministre des Finances*.- Et ass jo emol flott, Ennerstëtzung ze kréien.

(Hilarité et interruptions)

Jo, wat d'Klimagesetz an de Klimaplang ubelaangt, wëll ech och nach ënnersträichen, dass mer zwee grouss Prinzipien do festgehalen hunn, an zwar de Prinzip vun der sozialer Kohäsion a vun der sozialer Adaptatioun op där enger Säit an d'Anhaale vun der Budgetstrategie an de Reegele vum Stabilitéits- a Wuessumspakt.



D'Chambre de Commerce, d'Chambre des Métiers an de Conseil national des finances publiques hunn an hiren Avise virgeworf, dass d'Depensen, déi heivunner generéiert géife ginn, net am Budget zrëckbehalte sinn. Dofir wëll ech emol erklären, wéi mer dat hei am Budget erëmispigelen.

Déi Mesuren, déi am Klimaplang drastinn an déi et scho gëtt, déi sinn natierlech budgetiséiert: PRIMe House, Klimapakt mat de Gemen, Strategie MoDu 2.0 fir nohaltig Mobilitéit an natierlech gratis ëffentlechen Transport. Alles dat ass natierlech mat ageplangt. Mee nei Mesuren, déi kënnen jo nach guer net dra sinn. Mir hunn de Klimaplang de 6. Dezember presentéiert. Dee streckt sech iwwer eng Period vun zéng Joer, wou au fur et à mesure Mesurë wäerten ëmgesat ginn. An de Gros vun de Mesurë gëtt natierlech nach ganz zäitno am Laf vum Joer 2020 ëmgesat. An dann eréischt kënnen déi Mesuren natierlech budgetiséiert ginn an dann hire Virschäin do maachen.

Wichtig ass, dass een zwou Saachen do mécht. Dat eent: Et muss een natierlech ëmmer derfir suergen, dass de Stabilitéits- a Wuesstumspakt an eis Budgetziler agehale ginn. An zweetens muss een och derfir suergen, dass déi Mesuren, déi mer maachen, déi sinn, déi am effikasseste sinn, dat heescht, déi Mesurë virzéien, déi eis Emissionen am meeschte reduzéieren an am mannste kaschten, de beschte Rapport qualité/prix. An dat hu mer eis virgeholl an dat hu mer och an d'Klimagesetz geschriwwen, dass mer a Richtung gi vun enger, wat d'Chambre de Commerce nennt, « budgétisation par objectifs ». Dat heescht, de Comité interministériel, oder Komitee Klima genannt, dee wäert all déi Mesurë kucken an ofwiefen, fir dass mer dann déi richteg Prioritéite setze kënnen.

E fënneften a leschte Punkt an den Neiegkeeten, mee dee sech natierlech méi an d'Zukunft projéiert, ass, e puer Wuert ze soen iwwert d'Steierreform. Och do hu verschidden Avise gesot: Et fënnt ee keen Nidderschlag vun der Steuerreform am Budget 2020. Jo, dat kann ee jo net. Déi Steuerreform ass jo eréischt amgaangen ausgeschafft ze ginn.

A fir vläicht awer d'Akzenter hei ze nennen: Mir sinn amgaangen, dorunner ze schaffe mat dräi Prioritéiten: Zum engen Individualiséierung, Digitaliséierung a Simplificatioun; dat ass de Pilier 1. De Pilier 2 ass alles, wat mat Logement ze dinn huet. De Pilier 3 ass Klimaschutz an Environnement. Dat wäerten déi dräi Piliere sinn, op deene mer an der Steuerreform schaffe wäerten. Dir gesitt, dass scho bei deenen Aarbechtsgruppen, bei deene Piliere eng zolidd sozial an nohaltig Komponent virgesinn ass.

Ech erënneren och drun, dass mer jo eréischt virun zwéi Joer d'Entrée en vigueur hate vun der Steuerreform, déi Bettel 1 gemaach huet, déi mat sech bruecht huet, dass Steuererlichterung fir d'Personne-physique komm ware mat dem Crédit d'impôt salarial ënner anerem. An dat huet ongeféier 300 Milliounen Euro kascht. Dat war also eng Steuererlichterung. A parallel si jo och d'Steiere fir d'Entreprise vun 21 % op 18 % an där Steuerreform vun 2017 respektiv 2018 erofgesat ginn.

An ech rappeléieren och, dass eng Steuerreform, eng déif gräifend, net kann iwwert de Knéi gebrach ginn. Dat ass e groussen Effort. Dat ass eppes, wat Zäit hält. Wa mer an eiser Geschicht nokucken: Déi lescht Steuerreform virun där, déi dës Regierung gemaach hat, war 2001/2002, also 15 Joer zrëck. An déi Steuerreform, déi en fait de System agefouert huet, dee mer elo kenne mat de Steuerklassen, datéiert vun 1967 a war während enger Dose Joren ausgeschafft ginn.

Ech soen dat just, fir d'Saachen an d'Perspektiv ze setzen. Ech wëll awer och wierklech ënnersträichen, dass et de Wëlle vun der Regierung ass, dës grouss Steuerreform virun dem Enn vun der Legislaturperiode ënner Dach und Fach ze hunn.

Ech kommen dann elo op mäin drëtten Deel, an zwar dee vun den Observatione vun de verschiddenen Instanzen, déi en Avis iwwert de Budget ofginn hunn. An do hunn ech zwéi Theemen, déi ech wëll kuerz mat lech uschwätzen. Dat eent ass d'Zesummespill tëschent de Previsiounen an den Zuelen. An dat zweet ass den Niveau vum Investissement.

Zu den Zifferen: Mir verbréngen ëmmer ganz vill Zäit hei fir ze soen, dass d'Zifferen entweder ze héich oder ze niddreg sinn. Dës Joer ass keng Ausnam. Ech géif souguer soen, dës Joer ass ganz extra an där Hisiicht, dass déi eng fanen, dass d'Depensen ze héich ageschat ginn oder d'Recetten ze héich ageschat ginn an anerer ze niddreg.

Ech ginn e Beispill: D'Chambre des Salariés seet, dass d'Recettë vun der Betriebsbesteuerung ze déif ugesat sinn. D'Chambre des Métiers seet, dass d'Recetten um Niveau vun der Akommessteuer vun de Personnes physiques ze optimisteschesch ageschat sinn. An de Conseil national des finances publiques seet, dass d'Previsioun mat Virsicht ze genéisze sinn, well weeder d'Steierreform nach de Klimaplang dran zrëckbehalte sinn. Ech mengen, op déi lescht Kritik vum Conseil national des finances publiques hunn ech scho geäntwert. Elo kommen ech op déi aner zwou ze schwätzen, well dat natierlech zwéi grouss Aggregater sinn an eise Recetten.

Ier ech dat maachen, wëll ech awer nach eng Kéier rappeléieren, dass d'Regierung et fäerdegbruecht huet, an all deene Joren ëmmer besser Resultater ze hunn zum Schluss vum Joer an de Konte wéi dat, wat virgesi war.

Ech rappeléieren: 2016 hate mer en Defizit virgesi vu 438 Milliounen beim Zentralstaat an d'Resultat war 257 Milliounen Defizit. Bei all deene Joren, déi ech elo wäert opzielen, hate mer och natierlech en Iwwerschoss bei der Administration publique, mee mir konzentréieren eis elo hei op den Zentralstaat, d'Administration centrale.

Am Budget 2017 war en Defizit vun 851 Milliounen ugesat a mir hunn ofgeschloss mat engem Defizit vun 293 Milliounen.

2018 war en Defizit ugesat vun 967 Milliounen a mir endegen - mir wäerten déi Konte muer, mengen ech, hei diskutéieren -, mat 25 Milliounen Euro Defizit, also praktesch am Equilibre.

Fir 2019 wësse mer, well mer jo och reegelméisseg d'Chamber do informéieren, dass d'Resultat och vill besser wäert ginn, wéi virgesinn, a mer net wäit vum Equilibre wäerte sinn.

Wat ass den Haaptgrond, firwat mer ëmmer esou gutt ofschneiden? Zwou Saachen: Bei den Dépense si mer ëmmer ganz no bei de Previsiounen - mir exekutéieren also de Budget ganz -, mee bei de Recettë si mer virsichteg.

A wa mer dann elo op déi Kritik aginn, wat d'Kierperschaftssteuer ubelaangt, an ech mengen, et ass wichtig, dass mer doriwwer e puer Wuert soen, déi hu mer fir 2020 ugesat op 2 Milliarden an 250 Milliounen. Dat ass eng Hallef Milliard méi wéi am Joer 2019 ugesat war, mee dat ass nach ëmmer wäit ënnert deem, wat mer 2019 wäerten erakréien. Mir wäerten 2019 2,6 Milliarden erakréien. A wat schreiw mer an de Budget? 2 Milliarden an 250 Milliounen.

A mir mengen, dass dat eng virsichteg Approche ass, déi och justifiéiert ass an Zäite vu BEPS, ATAD, all deene Changementer an der internationaler fiskalescher Landschaft, an Zäite vun Onsécherheet op den internationale Mäert.

Wat och nach en extrae Phenomeen ass bei der Betriebsbesteuerung, dat ass, dass déi säit 2017 digitaliséiert ass an dass d'Steieren dofir ganz zäitno enregistriert ginn, wat natierlech mat sech bréngt, dass een d'Sue relativ séier erakritt, mee elo vill manner Reserven huet vun Nobesteuerung. Dat wäert sech alles elo apendelen.

Déi Tendenzen, déi mer bei der Kierperschaftssteuer hunn, hu mer natierlech och bei der Gewerbesteuer a bei der Verméigenssteuer, wou mer änlech positiv Zifferen gesinn an de leschten zwéi Joer.

Wéi ass et dann elo mat de Previsiounen vun der Akommessteuer bei de physische Persounen? Mir hunn do, wéi mer dat ëmmer maache bei de Recetten, déi selwecht Previsiounen geholl wéi déi, déi mer am Abrëll haten am Pacte de stabilité et de croissance.

En anere Punkt, deen, mengen ech, d'Virsicht vun der Regierung ënnersträicht, ass d'Schafe vun deem Fonds de rééquilibrage budgétaire. Et ass esou, dass, wann d'Perspektiv positiv sinn, wéi dat de Moment de Fall ass, et eng Méiglechkeet gëtt - mir hunn et awer elo nach net fäerdegbruecht -, dass mer och en Iwwerschoss am Budget vun der Administration centrale kéinten hunn. An dofir huet d'Regierung an deem Budgetsprojekt eng Dispositioun virgesinn, fir de Fonds de crise ze transforméieren an de Fonds de rééquilibrage budgétaire. De But vun deem Fonds de rééquilibrage ass, Reserven ze schafe fir déi Joren, wou et da méi schlecht geet.

Den Ënnerschied zwëschen deem Fonds de rééquilibrage budgétaire an dem Fonds souverain, dee mer jo hu fir déi nächst Generatiounen, ass, dass dee Fonds de rééquilibrage méi flexibel ass, fir kënnen drop zrëckzegräifen. An ech si frou, dass relativ vill Ënnerstützung fir dës Iddi opkomm ass.

Ech kommen dann zum zweete Punkt vun den Zifferen, dee mer wichtig schéngt. Dat sinn

déi héich Investissementen. Do schreift d'Chambre de Commerce, dass den Niveau vun den Investissementen zu Lëtzebuerg net aussergewöhnlech ass. Ech muss soen, ech hu vill Schwierigkeiten, fir dat ze verstoen. 2020 leien eis ëffentlech Investissementen bei 4,3 % vum PIB. An eise PIB wiest jo gutt. Dat heescht, par rapport zum PIB wuessen eis Investissementen ganz gutt. Mir sti vill besser do wéi d'Moyenne vun der Eurozon - déi läit bei 2,8 % -, vill besser do wéi eis Nopeschlänner. Ech ginn net op d'Detailer an.

Mir brauchen eis mat deene 4,3 % wierklech net ze verstoppen.

A wann ech dann d'Évolution pluriannuelle kucken zwëschen 2019 an 2023, wäerte mer am Schnëtt ëmmer iwwer 4 % leien. Dat heescht, dass 14 % vun den Dépense vun eiser Administration Investissementen sinn. A mir wäerte bis 2023 largement och iwwer 3 Milliarden Euro kommen. Wou investéiere mer dat? Mee ganz vill an Infrastrukturen, Fonds du rail, Fonds des routes, Fonds d'investissements administratifs et scolaires, vill Schoulen, Fonds pour la protection de l'environnement, Infrastrukture fir den Zuchverkéier, Schoulen, Accueil vu Jonken a vu Refugiéen, Spideeler, Sportinfrastrukturen, Sanierungsprojeten, villes an d'Recherche an an d'Digitaliséierung.

E besonneneschen Akzent läit säit Joren op Investissementen, déi ëmwelt- a Klimaschutzfrëndlech sinn. Ech hat déi Ziffer schon uginn, dat sinn 18 % vun deenen 3 Milliarden. An dat korrespondéiert mat 500 Milliounen Euro. An déi Ziffer geet stänneg an d'Luucht. 2023 wäert déi 660 Milliounen erreechen. Mäi Kommentar zur ganzer Saach ass Follgenden: Mir sinn a Saachen Investissementen zu Lëtzebuerg aussergewöhnlech verwinnt.

Ech kommen dann elo zu den Haaptaggregaten. An duerno kucke mer dann d'Gemengen an d'Sécurité sociale, fir dann e globaalt Bild ze hunn.

An der Administration centrale, wat de Kär vum Staat ass, wäerten d'Depensen 20,9 Milliarden erreechen an d'Recetten 20,3 Milliarden. Dat heescht, en Defizit vu 640 Milliounen ass fir d'nächst Joer virgesinn.

Ech wëll par rapport zu där Ziffer dräi Aspekter ervirsträichen.

Zum Éischten hu mer eng Dépense exceptionnelle vun 200 Milliounen ronn fir de Militärfleger A400M. Dat ass eng technesch Mesure. De Flieger ass scho laang bezuelt, mee mir mussen en iergendwann an engem Joer kontabiliséieren.

Wann een déi 200 Milliounen do ewechrechent, da kënnt een op 440 Milliounen, wat méi e richteg Bild erëmgeet vun der Situatioun fir 2020. Mir hunn, wéi ech virdru gesot hunn, 14 % vun de Käschten a Saachen Investissementen.

An drëtten, mir waren, an ech hunn dat och elo just beschriwwen, immens virsichteg mat de Previsiounen, soudass mer ganz optimisteschesch sinn, dass mer op jidde Fall dat, wat mer an de Budget schreiwen als Endresultat, och wäerten erreechen. Mee mir däerfen de Kapp net an de Sand steechen, well et ass awer richtig, dass d'Recetten am Joer 2020 manner séier wuesse wéi d'Depensen. Dat ass en negativ Schéiereffekt, deen ass do, dat muss ee realistesch soen. An dat erklärt och, firwat mer en Defizit hunn.

Mee d'Previsioun ass am Pluriannuel, dass deen Defizit lues a lues op null tendéiert a souguer zum Schluss vun der Period op e lichten Defizit aboutéiert. Den Haaptgrond, firwat mer déi Amélioratioun hunn, ass effektiv an der Administration centrale nozesichen.

Ech erënnere mech, wéi d'Chambre de Commerce an och d'CSV an aner Oppositionsparteien deemools gesot hunn, dass de Budget 2018 kee gudder Budget wär, well déi eenzeg Kontinuitéit, déi am Budget wär, dat wär den Defizit. Et bien, d'Zifferen vun de Konten 2017 an 2018 widerleee ganz einfach dës Ausso.

Ech kommen elo op d'Gemengen ze schwätzen. Déi hunn e Solde positif vun 286 Milliounen fir d'nächst Joer. An dat ass eng Ziffer, déi stabil ass a luecht an d'Luucht geet bis 2023 op 335 Milliounen.

Wat elo d'Sécurité sociale ubelaangt, déi wäert, léiwe Romain, d'nächst Joer en Excedent hu vun 1 Milliard a 56 Milliounen a wäert sech dann an deenen nächste Joren op deem héijen Niveau stabiliséieren. Mir hunn elo 2019 ongeféier 19 Milliarde Reserven am Fonds de compensation. Dat ass 4,5-mol den Niveau vun de Prestatiounen oder 30 % vun eise Rächtum vum PIB. An deene meeschte Länner ronderëm eis an Europa sinn d'Reserven, zum Beispill a Frankräich an an Däitschland, e puer Méint - oder tëschent 1 % an 3 % vum PIB.

Wann ech elo d'Administration publique huelen, déi déi dräi Aggregater zesummenzielt,

kommen ech fir 2020 op e positive Sold vu 757 Milliounen oder 1,2 % vum PIB. D'Europäesch Kommissioun kënnt an hire Previsiounen souguer op en Iwwerschoss vun 1,4 % vum PIB, 930 Milliounen. Dat heescht, d'Kommissioun ass méi optimisteschesch wéi mir a seet: „In 2020, higher revenue elasticity in the Commission forecast explains the [positive] difference.“ Also och d'Kommissioun fënnt, dass mer ganz realisteschesch hei sinn.

Bis 2023 gekuckt am Pluriannuel, wäert den Excedent vun der Administration publique op 1,5 Milliarden eropgoen. An déi Evolutioun bis 2023, déi positiv, ass haaptsächlech dorop zrëckzeféieren, dass mer an der Administration centrale wäerten ëmmer besser ofschneiden.

Wat ass dann d'Endresultat vun all deene Calculen? Dat ass de Solde structurel, dee faméis Solde structurel, wou Lëtzebuerg muss säin Objectif à moyen terme anhalen, an deen ass vun 2020 u plus 0,5 %. Dee war an der Period vun 2017 bis 2019 minus 0,5 %, dat ass also en Ënnerschied vun 1 % vum PIB. 1 % vum PIB, dat si 600 Milliounen Euro. Dat ass vill.

Et bien, eise Budget vun 2020 wäert och déi méi héich Erwaardungen erfëllen an déi plus 0,5 % anhalen. Dat begrëissen allegerquert d'Avise, ënner anerem och de Conseil national des finances publiques, d'Zentralbank an d'Europäesch Kommissioun. Mir haten ausge-rechent, dass de Solde structurel plus 0,9 % géif ginn, d'Kommissioun huet dat op plus 0,6 % ausgerechent. An déi Joren duerno geet de Solde structurel reegelméisseg erop, soudass en ëmmer iwwer 1 % läit, soudass mer och eng Marge de sécurité hu fir d'nächst Joer an déi Joren duerno.

Ech mengen, mir kënnen eis all iwwert dës Resultater freeën. D'Europäesch Kommissioun seet an hirem Avis, dass de Budget 2020, esou wéi Lëtzebuerg en op Brëssel geschéckt huet, en ligne ass mat de Previsiounen vum Stabilitéitspakt. Si invitéiert dofir Lëtzebuerg, de Budget 2020 esou unzehuelen.

En conclusion géif ech gären e Saz zitéieren. „Das öffentliche Wohl ist oberstes Gesetz“, so ten den Cicero, natierlech op Latäin, an den Helmut Schmidt op Däitsch. Mat deem Budget gëtt dës Regierung deem Leitmotiv gerecht.

Ech soen lech Merci.

► **Plusieurs voix.** - Très bien !

► **M. Fernand Etgen, Président.** - Merci villmools, Här Finanzminister. Ech ginn Akt vun der Deklaratioun vum Finanzminister.

3. 7500 Projet de loi concernant le budget des recettes et des dépenses de l'État pour l'exercice 2020 et modifiant :

1° la loi générale des impôts modifiée du 22 mai 1931 (« Abgabenordnung ») ;

2° la loi du 27 juillet 1938, portant création d'un fonds de réserve pour la crise ;

3° la loi modifiée du 4 décembre 1967 concernant l'impôt sur le revenu ;

4° la loi modifiée du 10 mars 1969 portant institution d'une inspection générale des finances ;

5° la loi modifiée du 12 février 1979 concernant la taxe sur la valeur ajoutée ;

6° la loi modifiée du 24 décembre 1996 portant introduction d'une bonification d'impôt sur le revenu en cas d'embauchage de chômeurs ;

7° la loi modifiée du 28 avril 1998 portant

a) harmonisation de l'enseignement musical dans le secteur communal ;

b) modification de l'article 5 de la loi du 24 mai 1989 sur le contrat de travail ;

c) modification de la loi modifiée du 22 juin 1963 fixant le régime des traitements des fonctionnaires de l'État ;

8° la loi électorale du 18 février 2003 telle que modifiée ;

9° la loi modifiée du 17 décembre 2010 fixant les droits d'accise et les taxes assimilées sur les produits